

## ADRODDIAD AR BROFIADAU AR GWRS ISELDIREG DWYS AR-LEIN

### RHAN 2

Credaf i bawb deimlo'n bryderus o ddychwelyd i'r dosbarth ar ôl saib o 4 diwrnod. Roedd hi'n beth da ein bod yn gyfarwydd â'r drefn erbyn hynny, ac yn gwybod y byddai'r wers yn dechrau efo cwis Kahoot!, felly roedd yn rhaid adolygu'r eirfa o'r wers flaenorol.

Unwaith i ni ddechrau, roedd pawb yn teimlo'n gartrefol yn syth. Mae hyn yn pwysleisio'r angen i gadw at drefn benodol a disgwylidig mewn cyrsiau dwys ar-lein.

### Gweithgareddau

Dyma'r rhai o'r pethau oedd wedi digwydd yn ystod y gwersi'r tro hwn. Roedd y tiwtor wedi rhoi'r taflenni gwaith pwrpasol i ni cyn pob gwrs. Byddaf yn cyfieithu rhai ohonynt ar ddiwedd y cwrs.

- **Gwneud rhestri yn y 'breakout rooms'** gydag un partner, megis 10 peth siomedig, 10 peth y dylid eu cadw'n gyfrinachol, 10 peth efallai y byddwch chi'n ei wneud yn y dyfodol
- **Ateb cwestiynau sy'n dangos dilyniant mewn trefn.** Mae hyn yn heriol mewn Iseldireg, gan fod y cystrawennau'n newid yn y cyd-destun hwn.
- **Rhannu lluniau o'r sefyllfa,** a'r myfyrwyr yn creu brawddegau
- **Cyfras o weithgareddau** yn trafod archebu bwyd
- **Rhannu'r myfyrwyr yn ddau grŵp.** Mae hyn yn cychwyn efo'r tiwtor yn newid enwau pawb, fel bod ganddynt naill ai **1** neu **2** o flaen eu henwau. Mae'r grŵp cyntaf yn cael rhestr o eiriau i'w dysgu (heb ysgrifennu). Mae'r grŵp arall yn dysgu 10 diffiniad (yn yr iaith darged). Yna paru pobl o'r gwahanol grwpiau a chael un person i enwi'r geiriau a'r llall i'w diffinio. Nod y dasg oedd sylweddoli nad oes angen Saesneg i esbonio geiriau newydd.
- **Mynd efo partner a cheisio dod o hyd i'r 10 gwahaniaeth mewn llun.** Rhoddwyd taflenni gyda geirfa ar gyfer y gweithgaredd hwn.
- **Trafod rhaglenni teledu mewn grwpiau o 3**
- **athrawes yn ysgrifennu gair fesul llythyren** ar 'chat' a'r myfyrwyr yn ceisio dyfalu beth ydy o.

## GWERTH YR APIAU

Fel tiwtor iaith, teimlaf ei bod yn holl-bwysig i mi ddysgu iaith arall, a hefyd mynd drwy'r un profiadau â'r dysgwyr. I'r perwyl hwnnw, ac i gadw'r iaith Iseldireg i fynd, dw i wedi defnyddio amrywiaeth o apiau.

Dechreuais gyda **Babbel**. Roeddwn i'n teimlo mai hwnnw oedd yr ap gorau i ddysgu iaith. Mae wedi'i gynllunio'n ofalus i ddatblygu llawer o'r sgiliau perthnasol: gwrando, darllen ac ysgrifennu. Mae'n weithredol yn ogystal â goddefol, gan ddisgwyl i'r myfyrwyr fewnbynnu'n gywir a rhedeg y ferf yn hyderus. Wrth gwrs, does dim modd datblygu sgiliau siarad a chyfathrebu. Roedd hynny'n ddigon i sicrhau fy mod yn ddigon da i fynychu cwrs Mynediad y tro cyntaf i mi fynd i'r Iseldiroedd, yn hytrach na Chyn-Fynediad.

Mi wnes i roi cynnig ar **SaySomethingInDutch**, ond doeddwn i ddim yn hoffi'r dulliau dysgu, oedd yn f'atgoffa o'r labordai iaith yn y saith-degau.

Ers hynny, cyn ac ar ôl i mi fynychu'r ail gwrs yn yr Iseldiroedd, dw i wedi bod yn defnyddio **Memrise** a **Duolingo** yn ffyddlon. Dw i'n gwybod fel athrawes iaith nad ydynt yn cynnig y ffyrdd gorau o ddysgu, ond o leiaf drwy eu gwneud bob dydd (yn feunyddiol ers dros 600 o ddiwrnodau yn ddi-dôr) dw i'n sicrhau fy mod yn clywed yr iaith ac yn gwneud rhywbeth i gadw'r iaith yn fyw. Ar ben hynny, gan fod cynifer o ddysgwyr yn defnyddio **Duolingo**, mae'n rhoi syniad da i mi o'r hyn y maent yn ei wneud.

Er hynny, doeddwn i ddim yn teimlo fy mod yn cael budd o'u defnyddio, gan fy mod yn dysgu cyfresi o eiriau di-gyswllt, a brawddegau allan o gyd-destun (ni ddefnyddir y geiriau mewn deialogau) . Ond dw i wedi dal ati.

Fodd bynnag, un o'r pethau sydd wedi fy nharo wrth fynychu'r cwrs ar-lein ydy bod yr apiau yn dangos eu gwerth. Mae angen dysgu geirfa bwrpasol ar gyfer pob uned ar yr Ysgol Haf, a dw i wedi darganfod bod gennyf gronfa o eirfa wrth gefn sy'n berthnasol i'r gwersi. Yn yr un fath, mae fy nghystrawennau'n gymharol gadarn, gan fy mod wedi clywed yr un brawddegau droeon wrth ddefnyddio'r apiau.

## Syniadau

Un peth mae'r tiwtor yn ein hannog i'w wneud ydy clicio ar 'ask host for help' os ydyn ni'n cael trafferth yn y **breakout rooms**.

Mae'n amlwg y dylai pob **pwerbwynt** sy'n cael ei rannu ar **Zoom** fod dim ond tri chwarter llawn, wedi'i alinio i'r chwith. Gan fod y rhes o wynebau ar yr ochr dde nid yw pawb yn medru gweld popeth ar y pwyntiau pŵer. Mae ffyrdd i ddatrys y problemau hyn wrth symud yr wynebau i rannau eraill o'r cyfrifiadur, ond gan nad yw pawb mor hyderus gyda thechnoleg, mae'n ddoethach osgoi'r broblem drwy greu sleidiau sy'n cyd-fynd â'r sustem.

Yn bersonol, fydda i byth yn defnyddio 'chat' na 'whiteboard' ar gyfer rhoi nodiadau i'r myfyrwyr. Mi fydda i bob tro yn defnyddio **dogfen Word** wag, yna, ar ddiwedd y wers, mae gen i ddogfen gyda'r holl nodiadau yn barod i'w rhannu gyda'r dysgwyr.

Un peth syml iawn, ydy awgrymu i'r myfyrwyr **wynebu'r golau** er mwyn bod yn weladwy i'r myfyrwyr eraill.

## Ystafell Gyfarfod

Mae'r **Dutch Summer School** wedi creu ystafell gyfarfod ar **Zoom** lle mae'r myfyrwyr o bob lefel yn medru dod at ei gilydd. Mae'n bosib creu **breakout rooms** os oes mwy nag un lefel yno. Mae hi'n agored drwy'r amser. Byddai rhaid i'r myfyrwyr drefnu amser penodol i ddod at ei gilydd er mwyn iddi fod yn ddefnyddiol. Dw i wedi ymweld â'r lle, ond doedd neb yna.

Un wers sydd ar ôl. Byddaf yn rhoi casgliadau terfynol ar y profiad yn ei gyfanrwydd yr wythnos nesaf, yn ogystal â chyfieithiadau o'r adnoddau gorau.

**Pegi Talfryn**

5 Mehefin 2020